

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02- 464/07
Sarajevo, 12.07.2007. godine

Z A P I S N I K

4. SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 14. juna i 12. jula 2007. godine

Sjednica je počela u 11.32.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: potpredsjednike Federacije Bosne i Hercegovine Spomenku Mičić i Mirsada Kebu, premijera Nedžada Brankovića i ministre u Vladi Federacije Bosne i Hercegovine, predstavnike međunarodnih organizacija, goste i predstavnike akreditiranih medijskih kuća koji prate rad sjednice.

Na osnovu evidencije Stručne službe, predsjedavajući je konstatovao da sjednici prisustvuje 47 delegata, što čini većinu, te da Dom naroda može raditi i punovažno odlučivati.

Prije prelaska na rad usvojen je, bez primjedbi, Zapisnik 3. sjednice Doma naroda Parlamenta Federacije Bosne i Hercegovine, održane 08. maja 2007. godine.

Nakon toga predsjedavajući je podsjetio delegate da na osnovu člana 104. Poslovnika o radu Doma naroda mogu postavljati delegatska pitanja, pokretati inicijative ili izraziti nezadovoljstvo dobijenim odgovorom.

Delegatska pitanja i inicijative

Igor Rajner je izrazio nezadovoljstvo dobijenim odgovorom u vezi sa pitanjem koje se odnosi na kriterij raspodjele sredstava za stimulaciju poljoprivredne proizvodnje i ponovo postavio isto pitanje Vladi Federacije Bosne i Hercegovine.

Elvira Abdić-Jelenović postavila je pitanje premijeru Federacije Bosne i Hercegovine, resornim ministrima, Fondaciji za održivi razvoj, direktoru Agencije za privatizaciju Federacije Bosne i Hercegovine i Komisiji za ljudska prava pri Ustavnom sudu Bosne i Hercegovine, koje se odnosi na reviziju vlasničke strukture kapitala u „Agrokomercu“ d.d. Velika Kladuša.

Uputila je i inicijativu Kolegiju Doma naroda da u skladu sa ovlastima iznađe mogućnost za direktni prijenos sjednica Doma naroda na Federalnoj televiziji.

Mira Ljubijankić je predložila da se predsjednicima ustavnih komisija oba doma Parlamenta Federacije Bosne i Hercegovine dostave ustavni amandmani kako bi se riješio problem popune Kluba delegata srpskog naroda u Domu naroda Parlamenta Federacije Bosne i Hercegovine.

Drago Puzigaća je postavio pitanje premijeru Federacije u vezi sa posjetom i pomoći Općini Drvar.

Miro Lazović je tražio od Vlade Federacije da preispita svoju odluku koja se odnosi na visinu položajnog dodatka.

Na ovo pitanje premijer Nedžad Branković je odgovorio da položajni dodatak supstituiru sve naknade na koje su ministri imali pravo kroz razne komisije, ekonomsko- socijalno vijeće i druge aktivnosti.

Miro Lazović je tražio da povećanje ministarskih plaća bude urađeno na transparentniji način.

Vjekoslav Bevanda, federalni ministar finansija, je izjavio da je položajni dodatak uveden na transparentan način.

Besim Spahić je zatražio da mu se dostave podaci o uplaćenim mjesečnim doprinosima za penzijsko i invalidsko osiguranje u Federaciji Bosne i Hercegovine po kantonima i općinama od 01.01.2007. godine.

Muhamed Osmić je postavio pitanje zašto u predloženom dnevnom redu nije uvrštena točka - Potvrđivanje odluka i zakona Visokog predstavnika - i zašto Parlament Federacije ne ratifikuje zakon kojim su izmijenjene granice općine Žepče. Zatražio je da se dokumentacija u vezi sa ovim problemom dostavi Uredu Visokog predstavnika.

Također je pokrenuo i inicijativu za formiranjem jedinstvenog fonda zdravstvene zaštite na nivou Federacije Bosne i Hercegovine.

Lidija Bradara je Vladi Federacije podnijela inicijativu za prekategoriizaciju regionalne ceste R442 Kaonik–Kiseljak–Blažuj u dužini od 48,45 km u magistralnu cestu M5.

Mislav Sučić je pokrenuo inicijativu da Vlada Federacije zajedno sa Ministarstvom vanjske trgovine i Uredom za veterinarstvo na državnom nivou pooštri kriterije za uvoz domaćih životinja.

Postavio je i pitanje pod čijom je ingerencijom Javno preduzeće Jadranski sliv i Javno preduzeće sliv rijeke Save.

Vanja Broćeta je obavijestila Dom naroda da su Odbor za privredu i Odbor za ekonomsku i razvojnu politiku, finansije i budžet pokrenuli inicijativu kojom bi Dom naroda Parlamenta Federacije zadužio Vladu Federacije da pripremi i dostavi Parlamentu Federacije strategiju razvoja i program privatizacije elektroenergetskog i sektora telekomunikacija u Federaciji Bosne i Hercegovine.

Uputila je pitanje Vladi Federacije da li će formirati interesnu grupu radi sagledavanje stanja u općinama Drvar, Bosansko Grahovo i Glamoč.

Slobodan Rodić pitao je federalnog ministra za izbjegla i raseljena lica kada će posjetiti Drvar.

Tomo Vidović je pokrenuo inicijativu ka Kolegiju Doma naroda da se izradi program rada Doma naroda.

Uputio je pitanje Vladi Federacije u kojoj fazi je postupak zaključivanja granskog kolektivnog ugovora za djelatnost zdravstva u Federaciji Bosne i Hercegovine.

Na ovo pitanje federalni ministar zdravstva, **Safet Omerović** je odgovorio da je Vlada Federacije napravila prijedlog sporazuma između sindikata i poslodavaca koji je bio usaglašen još 18. aprila i nakon toga upućen vladama kantona.

Svetozar Pudarić je uputio pitanje Vladi Federacije ko je i u kojem iznosu za rad, i u kojim komisijama od članova Vlade Federacije iz prošlog saziva primio dva miliona i 160 hiljada KM u toku prošle godine i zatražio da se delegatima dostavi spisak sa imenima i prezimenima onih koji su dobili spomenuti iznos.

Besim Imamović je postavio dva pitanja.

Prvo pitanje je uputio Federalnom ministarstvu poljoprivrede, vodoprivrede i šumarstva u vezi sa analizom provođenja Zakona o šumama u segmentu formiranja kantonalnih šumskih uprava i preuzimanja nadležnosti koje Zakon propisuje.

Drugo pitanje je uputio Vladi Federacije a odnosi se na realizaciju projekata od Razvojne agencije.

Saša Magazinović je inicirao da se uskladi održavanje sjednica Doma naroda sa održavanjem sjednica kantonalnih skupština.

Istakao je problem neprisustva članova Vlade Federacije na sjednicama radnih tijela i klubova delegata Doma naroda.

Zoran Budimić je pokrenuo inicijativu za izmjene i dopune Zakona o novčanim potporama i poticajima u primarnoj poljoprivrednoj proizvodnji, s obzirom da je vidljivo da u čl. 8. i 9. Zakona, u namjenama sredstava za potporu poljoprivrednoj proizvodnji, nije uvršteno regresirano gorivo za poljoprivredne strojeve.

Također, postavio je pitanje Federalnom ministarstvu poljoprivrede, vodoprivrede i šumarstva u vezi sa prikupljenim sredstvima od prelevmana.

Slobodan Zivlak je postavio pitanje federalnom ministru poljoprivrede, vodoprivrede i šumarstva u vezi sa pomoći stočarima i poljoprivrednicima u Kantonu 10.

Tomo Vidović se osvrnuo na odgovore federalnog ministra zdravstva i predložio da se pristupi izmjenama Zakona o zdravstvenom osiguranju, te da se za narednu sjednicu Doma naroda pripremi analitički materijal o stanju u zdravstvenoj zaštiti i zdravstvenom osiguranju Federacije Bosne i Hercegovine.

Nakon postavljenih pitanja i pokrenutih inicijativa, predsjedavajući je podsjetio delegate da je Vlada Federacije dostavila Prijedlog Zakona o

izmjenama Zakona o prodaji stanova na kojima postoji stanarsko pravo i Prijedlog Zakona o osnivanju instituta za medicinsko vještačenje s prijedlogom da se razmatraju po hitnom postupku.

Predsjedavajući je pozvao delegate da se na osnovu člana 188. Poslovnika o radu Doma naroda izjasne da li prihvataju da se ovi zakoni razmatraju po hitnom postupku.

U vezi sa ovim u raspravi su učestvovali predsjednik Kluba hrvatskih delegata Josip Perić, premijer Nedžad Branković i Vanja Broćeta.

Nakon toga predsjedavajući je stavio na glasanje prijedlog Vlade Federacije da se Prijedlog Zakona o izmjenama Zakona o prodaji stanova na kojima postoji stanarsko pravo razmatra po hitnom postupku.

Ovaj prijedlog delegati su usvojili, sa 32 glasa za i uz jedan uzdržani glas.

Predsjedavajući je stavio na glasanje prijedlog Vlade Federacije da se Prijedlog Zakona o osnivanju instituta za medicinsko vještačenje razmatra po hitnom postupku.

Ovaj prijedlog delegati nisu usvojili jer je za njega glasalo 19 delegata, šesnaest je bilo protiv i jedan uzdržan, te će se ovaj zakon razmatrati u formi nacrtu, tj. u redovnoj proceduri.

Zatim je predsjedavajući pozvao delegate da se izjasne o prijedlogu Kluba zastupnika Stranke za BiH u Predstavničkom domu da se Prijedlog Zakona o izmjenama i dopunama Zakona o izvršavanju budžeta Federacije Bosne i Hercegovine, čiji je predlagač, razmatra po hitnom postupku i o prijedlogu Kluba zastupnika SDA u Predstavničkom domu da se Prijedlog Zakona o pomilovanju, čiji je predlagač razmatra po hitnom postupku.

U diskusiji o ovim prijedlozima učestvovali su: Svetozar Pudarić, Jasenko Tufekčić, Nedžad Branković, Tomo Vidović, Besim Imamović, Josip Perić, Igor Rajner i Asim Mekić.

Na osnovu rezultata glasanja, predsjedavajući je konstatovao da prijedlozi nisu dobili potrebnu većinu glasova.

Predsjedavajući je potom obavijestio delegate da je Vlada Federacije dostavila šest prijedloga zakona sa prijedlogom da se razmatraju po skraćenom postupku i, na osnovu rezultata glasanja, konstatovao sljedeće:

- sa 41 glasom za i uz dva uzdržana glasa, delegati su prihvatili da se Prijedlog Zakona o izmjenama i dopunama Zakona o duhanu razmatra po skraćenom postupku;
- delegati su, jednoglasno, prihvatili da se Prijedlog Zakona o izmjenama i dopunama Zakona o krivičnom postupku u Federaciji Bosne i Hercegovine razmatra po skraćenom postupku;
- sa 42 glasa za, uz jedan glas protiv i uz jedan uzdržani glas, delegati su prihvatili da se Prijedlog Zakona o načinu prestanka funkcioniranja Institucije ombudsmena Federacije Bosne i Hercegovine u prijelaznom periodu i prijenosu njenih nadležnosti

- na Instituciju ombudsmena za ljudska prava Bosne i Hercegovine razmatra po skraćenom postupku;
- sa 44 glasa za i uz jedan uzdržani glas, delegati su prihvatili da se Prijedlog Zakona o klasifikaciji djelatnosti u Federaciji Bosne i Hercegovine razmatra po skraćenom postupku;
 - sa 43 glasa za, uz jedan glas protiv i uz jedan uzdržani glas, delegati su prihvatili da se Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine razmatra po skraćenom postupku;
 - sa 44 glasa za i uz jedan uzdržani glas, delegati su prihvatili da se Prijedlog Zakona o izmjenama i dopunama Zakona o provedbi odluka Komisije za zaštitu nacionalnih spomenika, uspostavljene prema Aneksu 8. Općeg okvirnog sporazuma za mir u Bosni i Hercegovini, razmatra po skraćenom postupku.

Potom je predsjedavajući obavijestio delegate da je kao 12. tačka dnevnog reda predviđeno razmatranje Prijedloga Zakona o Finansijsko-informatičkoj agenciji. Napomenuo je da je Zakon dostavljen u formi nacрта, a da je na sjednici Predstavničkog doma, održanoj 29. maja 2007. godine, predstavnik Vlade Federacije obavijestio zastupnike da je u nazivu Zakona došlo do tehničke greške jer je Zakon ranije razmatran u formi nacрта te je Kolegij predložio da se ovaj Zakon razmatra u formi prijedloga, što je podržao i Vjekoslav Bevanda, federalni ministar finansija.

S tim u vezi razvila se diskusija u kojoj su učestvovali: predsjednica Kluba delegata srpskog naroda Mira Ljubijankić, Muhamed Osmić, Svetozar Pudarić i sekretar Doma naroda Izmir Hadžiavdić.

Predsjedavajući je stavio na glasanje prijedlog Kolegija i na osnovu rezultata glasanja konstatovao da Dom naroda Parlamenta Federacije Bosne i Hercegovine nije prihvatio da se Zakon o finansijsko-informatičkoj agenciji razmatra u formi prijedloga jer je za to glasalo 15 delegata, 14 je bilo protiv i devet uzdržanih. Predsjedavajući je konstatovao da će se Zakon razmatrati u formi nacрта.

Kolegij Doma naroda predložio je da se u dnevni red kao 1. tačka uvrsti - Verifikacija mandata.

Predsjedavajući je obavijestio delegate da je premijer Federacije 16. maja 2007. godine uputio u parlamentarnu proceduru Prijedlog Zakona o izmjenama i dopunama Zakona o grbu i zastavi Federacije Bosne i Hercegovine, s prijedlogom da se razmatra po hitnom postupku i da je Vlada Federacije predložila da se Prijedlog Zakona uvrsti u dnevni red ove sjednice, kao i da je Kolegij Doma naroda predložio da se Prijedlog Zakona razmatra kao 20. tačka dnevnog reda, što su delegati prihvatili.

Zatim se prešlo na glasanje o dnevnom redu

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 41 glasom za i uz šest uzdržanih glasova, usvojio sljedeći:

DNEVNI RED

1. Verifikacija mandata;
2. Politika djelovanja i osnovne strategije Vlade Federacije Bosne i Hercegovine u mandatnom periodu 2007–2010. godina sa operativnim planom za 2007. godinu;
3. Prijedlog Zakona o izmjenama Zakona o prodaji stanova na kojima postoji stanarsko pravo – hitni postupak;
4. Nacrt Zakona o izmjenama i dopunama Zakona o izvršavanju Budžeta Federacije Bosne i Hercegovine za 2007. godinu (predlagač: Klub zastupnika Stranke za BiH u Predstavničkom domu);
5. Nacrt Zakona o pomilovanju (predlagač: Klub zastupnika SDA u Predstavničkom domu);
6. Nacrt Zakona o osnivanju instituta za medicinsko vještačenje;
7. Prijedlog Zakona o izmjenama i dopunama Zakona o duhanu - skraćeni postupak;
8. Prijedlog Zakona o izmjenama i dopunama Zakona o krivičnom postupku u Federaciji Bosne i Hercegovine - skraćeni postupak;
9. Prijedlog Zakona o načinu prestanka funkcioniranja Institucije ombudsmena Federacije Bosne i Hercegovine u prijelaznom periodu i prijenosu njenih nadležnosti na Instituciju ombudsmena za ljudska prava Bosne i Hercegovine - skraćeni postupak;
10. Prijedlog Zakona o klasifikaciji djelatnosti u Federaciji Bosne i Hercegovine - skraćeni postupak;
11. Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine - skraćeni postupak;
12. Prijedlog Zakona o izmjenama i dopunama Zakona o provedbi odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini – skraćeni postupak;
13. Nacrt Zakona o Finansijsko - informatičkoj agenciji;
14. a) Odluka o davanju saglasnosti za prihvatanje kredita Fonda za Međunarodni razvoj (OPEC) za finansiranje Projekta unapređenja ruralnog poduzetništva,
b) Odluka o davanju saglasnosti za zaključivanje Supsidijarnog kreditnog sporazuma između Federacije Bosne i Hercegovine i Bosne i Hercegovine za kredit Fonda za Međunarodni razvoj (OPEC) za Projekt unapređenja ruralnog poduzetništva,
c) Informacija o kreditu Fonda za Međunarodni razvoj (OPEC) za Projekt unapređenje ruralnog poduzetništva;

15. a) Odluka o davanju saglasnosti za prihvatanje kredita Evropske investicione banke za finansiranje Projekta «Rehabilitacija cesta u Federaciji Bosne i Hercegovine»,
- b) Odluka o davanju saglasnosti za zaključivanje Podugovora o kreditu između Bosne i Hercegovine i Federacije Bosne i Hercegovine za kredit Evropske investicione banke (EIB) za Projekt «Rehabilitacija cesta u Federaciji Bosne i Hercegovine»,
- c) Informacija o finansiranju Projekta «Rehabilitacija cesta u Federaciji Bosne i Hercegovine» iz kredita Evropske investicione banke;
16. Izvještaj o radu Nadzornog odbora Agencije za privatizaciju u Federaciji Bosne i Hercegovine za period od 01.07.2005. do 30.06.2006. godine;
17. Izvještaj o radu Regulatorne komisije za električnu energiju u Federaciji Bosne i Hercegovine za 2006. godinu;
18. Godišnji izvještaj Visokog sudskog i tužilačkog vijeća Bosne i Hercegovine;
19. Izvještaj o izvršenju Budžeta Federacije Bosne i Hercegovine u periodu od 01.01.2006. do 31.12.2006. godine;
20. Prijedlog Zakona o izmjenama i dopunama Zakona o grbu i zastavi Federacije Bosne i Hercegovine - hitni postupak;
21. Izbori i imenovanja.

1. Verifikacija mandata

Centralna izborna komisija Bosne i Hercegovine je obavijestila Dom naroda Parlamenta Federacije Bosne i Hercegovine da je dodijelila mandate kvalifikovanim kandidatima iz reda srpskog naroda i to **Bojanu Bošnjaku i Slobodanu Tomiću**.

Mandatno-imunitetska komisija je razmatrala ovaj prijedlog i dostavila Domu naroda Izvještaj.

U raspravi nije niko učestvovao.

Na osnovu rezultata glasanja predsjedavajući je konstatovao da je Dom naroda Parlamenta Federacije Bosne i Hercegovine jednoglasno usvojio Izvještaj Mandatno-imunitetske komisije i time verifikovao mandat delegatima u Domu naroda Parlamenta Federacije Bosne i Hercegovine **Bojanu Bošnjaku i Slobodanu Tomiću**.

Potom su izabrani delegati dali zakletvu.

2. Politika djelovanja i osnovne strategije Vlade Federacije Bosne i Hercegovine u mandatnom periodu 2007–2010. godina sa operativnim planom za 2007. godinu

Vlada Federacije Bosne i Hercegovine dostavila je Parlamentu Federacije Bosne i Hercegovine ovaj materijal radi razmatranja i usvajanja.

Predstavnički dom Parlamenta Federacije Bosne i Hercegovine je na 2. sjednici, održanoj 29. maja 2007. godine, razmatrao ovaj materijal i zaključcima ga prihvatio.

Materijal su razmatrala radna tijela Doma naroda i dostavila svoje izvještaje.

Politiku djelovanja i osnovne strategije je obrazložio premijer Nedžad Branković.

U raspravi su učestvovali: predsjednica Kluba delegata srpskog naroda Mira Ljubijankić, Igor Rajner, Elvira Abdić-Jelenović, Alija Begović, Tomo Vidović, Radoje Vidović, Dženana Zlatar, Miro Lazović, Sead Čaušević, Mislav Sučić, premijer Nedžad Branković, Drago Puzikaća, Besim Imamović, Ivo Komšić, Josip Perić, Svetozar Pudarić, Nada Čulap i Zoran Budimić.

Nakon zaključene rasprave predsjedavajući je obavijestio delegate da je na Kolegiju Doma naroda dogovoreno da se **odgodi izjašnjanje** o ovom materijalu dok Vlada Federacije Bosne i Hercegovine ne ugradi u njegov tekst prijedloge, primjedbe i sugestije iznesene na sjednici Doma naroda.

Nakon toga je prekinuo rad sjednice u 17.12.

NASTAVAK SJEDNICE, ODRŽANE 12. JULA 2007. GODINE

Sjednica je počela u 10.34.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio: delegate, predsjednicu Federacije Bosne i Hercegovine Borjanu Krišto, ministre u Vladi Federacije Bosne i Hercegovine, predstavnike Saveza invalida Bosne i Hercegovine, predstavnike akreditiranih medijskih kuća, predstavnike međunarodnih institucija i goste.

Izostanak sa sjednice su opravdali Tomo Vidović i Denis Zvizdić.

Na osnovu evidencije Stručne službe, predsjedavajući je konstatovao da sjednici prisustvuje 45 delegata, što čini većinu, te da Dom naroda može raditi i punovažno odlučivati.

Na početku sjednice predsjedavajući je obavijestio delegate da je premijer Nedžad Branković dostavio dopis kojim iz procedure privremeno povlači Prijedlog Zakona o izmjenama i dopunama Zakona o krivičnom postupku Federacije Bosne i Hercegovine. S obzirom na to da je prvo potrebno da Parlament Federacije potvrdi Prijedlog Zakona o izmjenama i dopunama Zakona o krivičnom postupku koji je Odlukom od 13.04.2007.

godine proglasio Visoki predstavnik, na privremenoj osnovi, do njegovog potvrđivanja u Parlamentu Federacije.

Također, obavijestio je delegate da je na 3. sjednici Predstavničkog doma, održanoj 3.07.2007. godine, premijer povukao Prijedlog Zakona o izmjenama i dopunama Zakona o grbu i zastavi Federacije Bosne i Hercegovine tako da se on neće razmatrati ni na Domu naroda.

Predsjedavajući je obavijestio delegate da je premijer dostavio dopis u kojem je naveo razloge zbog kojih bi Prijedlog Zakona o osnivanju instituta za medicinsko vještačenje trebalo razmatrati po hitnom postupku, a koji je Dom naroda, prilikom utvrđivanja dnevnog reda, vratio u redovnu proceduru, tj. u formu nacrtu.

Delegati nisu prihvatili prijedlog premijera da se Zakon razmatra u formi prijedloga jer prilikom glasanja, ni nakon pojedinačnog izjašnjavanja koje je obavio sekretar Doma naroda, nije dobio potrebnu većinu glasova. Za prijedlog su bila 22 delegata, 18 je bilo uzdržanih a pet protiv.

Potom je predsjedavajući prešao na rad po utvrđenom dnevnom redu.

3. Prijedlog Zakona o izmjenama Zakona o prodaji stanova na kojima postoji stanarsko pravo

Prijedlog Zakona utvrdila je Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela koja su dostavila svoje izvještaje.

Prijedlog Zakona obrazložio je federalni ministar prostornog uređenja Salko Obhodžaš.

U pretresu je učestvovao Jasenko Tufekčić.

Nakon toga predsjedavajući je dao na glasanje Prijedlog Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 47 glasova, usvojio Prijedlog Zakona o izmjenama Zakona o prodaji stanova na kojima postoji stanarsko pravo.

4. Nacrt Zakona o izmjenama i dopunama Zakona o izvršavanju Budžeta Federacije Bosne i Hercegovine za 2007. godinu

Predlagač Zakona je Klub zastupnika Stranke za BiH u Predstavničkom domu.

Predstavnički dom je obavijestio Dom naroda da je na nastavku 2. sjednice, održane 30.05.2007. godine, usvojio Zakon u formi prijedloga.

Zakon su razmatrala nadležna radna tijela koja su dostavila svoje izvještaje.

U pretresu su učestvovali Mislav Sučić, Besim Imamović i Ivo Komšić.

Na osnovu rezultata poimeničnog glasanja, predsjedavajući je konstatovao da je Dom naroda, sa 30 glasova za, uz šest glasova protiv i uz 10 uzdržanih glasova, usvojio sljedeći:

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt Zakona o izmjenama i dopunama Zakona o izvršavanju Budžeta Federacije Bosne i Hercegovine za 2007. godinu i smatra da može poslužiti kao osnova za izradu prijedloga Zakona.
2. Zadužuje se predlagač da prilikom izrade prijedloga Zakona ima u vidu primjedbe, prijedloge i sugestije iznesene na sjednici Doma naroda.

5. Nacrt Zakona o pomilovanju

Predlagač Zakona je Klub zastupnika SDA u Predstavničkom domu.

Predstavnički dom je obavijestio Dom naroda da je na nastavku 2. sjednice, održane 30.05.2007. godine, usvojio Zakon u formi prijedloga uz jedan amandman koji se odnosi na član 3. Amandman nije prihvaćen od predlagača, ali ga je Predstavnički dom izglasao.

Zakon su u formi prijedloga razmatrala nadležna radna tijela koja su dostavila svoje izvještaje.

Ispred Kluba zastupnika SDA Zakon je obrazložio Ibrahim Nadarević.

U raspravi su učestvovali: Dženana Zlata, Svetozar Pudarić, Jasenko Tufekčić i Lidija Bradara.

Na osnovu rezultata poimeničnog glasanja, predsjedavajući je konstatovao da Dom naroda nije prihvatio Nacrt Zakona o pomilovanju jer je za glasalo 27 delegata, 11 je bilo protiv, a šest je bilo uzdržanih.

6. Nacrt Zakona o osnivanju instituta za medicinsko vještačenje

Zakon je u formi Prijedloga utvrdila Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Zakon u formi prijedloga uz sedam amandmana, koje je Vlada Federacije prihvatila pa su postali sastavni dio Prijedloga Zakona.

Zakon su u formi prijedloga razmatrala nadležna radna tijela koja su dostavila svoje izvještaje.

Zakon je obrazložio Perica Jelečević, federalni ministar rada i socijalne politike.

U pretresu nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 35 glasova, usvojio sljedeći:

ZAKLJUČAK

Dom naroda Parlamenta Federacije Bosne i Hercegovine prihvata Nacrt Zakona o osnivanju instituta za medicinsko vještačenje i smatra da može poslužiti kao osnova za izradu prijedloga Zakona.

7. Prijedlog Zakona o izmjenama i dopunama Zakona o duhanu

Prijedlog Zakona utvrdila je Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona su razmatrala nadležna radna tijela koja su dostavila svoje izvještaje.

Prijedlog Zakona je obrazložio Vedad Hadžimusić, pomoćnik federalnog ministra poljoprivrede, vodoprivrede i šumarstva.

U pretresu nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 43 glasa, usvojio Prijedlog Zakona o izmjenama i dopunama Zakona o duhanu.

8. Prijedlog Zakona o izmjenama i dopunama Zakona o krivičnom postupku Federacije Bosne i Hercegovine

Predsjedavajući je podsjetio delegate da je Visoki predstavnik svojom Odlukom od 13.04.2007. godine proglasio ovaj Zakon pa je potrebno da ga Parlament Federacije potvrdi u istoj formi i sadržini, tj. bez podnošenja amandmana.

Predstavnički dom je na 3. sjednici, održanoj 03.07.2007. godine, usvojio Prijedlog Zakona u tekstu kako ga je proglasio Visoki predstavnik od 13.04.2007. godine.

U pretresu nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 44 glasa za i uz jedan uzdržani glas, usvojio Prijedlog Zakona o izmjenama i dopunama

Zakona o krivičnom postupku Federacije Bosne i Hercegovine, koji je svojom Odlukom proglasio Visoki predstavnik.

9. Prijedlog Zakona o načinu prestanka funkcioniranja Institucije ombudsmena Federacije Bosne i Hercegovine u prijelaznom periodu i prijenosu njenih nadležnosti na Instituciju ombudsmena za ljudska prava Bosne i Hercegovine

Prijedlog Zakona utvrdila je Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Prijedlog Zakona uz jedan amandman koji je Vlada Federacije prihvatila pa je postao sastavni dio Prijedloga Zakona. Amandman se odnosi na čl. 1. i 3.

Prijedlog Zakona su razmatrala nadležna radna tijela koja su dostavila svoje izvještaje.

Prijedlog Zakona je obrazložio Ivan Matešić, savjetnik federalnog ministra pravde.

U pretresu nije niko učestvovao.

Na osnovu rezultata glasanja, potpredsjedavajući Doma naroda Besim Imamović, koji je tada predsjedavao sjednicom, konstatovao je da je Dom naroda Parlamenta Federacije Bosne i Hercegovine jednoglasno, sa 42 glasa, usvojio Prijedlog Zakona o načinu prestanka funkcioniranja Institucije ombudsmena Federacije Bosne i Hercegovine u prijelaznom periodu i prijenosu njenih nadležnosti na Instituciju ombudsmena za ljudska prava Bosne i Hercegovine.

10. Prijedlog Zakona o klasifikaciji djelatnosti u Federaciji Bosne i Hercegovine

Prijedlog Zakona utvrdila je Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona su razmatrali: Zakonodavno-pravna komisija, Komisija za jezička pitanja, Odbor za pravdu, opću upravu i lokalnu samoupravu i, na zajedničkoj sjednici, Odbor za ekonomsku i razvojnu politiku, finansije i budžet i Odbor za privredu koji su dostavili svoje izvještaje.

U pretresu nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 42 glasa, usvojio Prijedlog Zakona o klasifikaciji djelatnosti u Federaciji Bosne i Hercegovine.

11. Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine

Prijedlog Zakona je utvrdila Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrali su: Zakonodavno-pravna komisija, Komisija za jezička pitanja, Odbor za prostorno uređenje, ekologiju i stambeno-komunalne poslove i Odbor za poljoprivredu, vodoprivredu i šumarstvo, koji su dostavili svoje izvještaje.

Na Prijedlog Zakona amandmane su podnijeli: Mirsad Pindžo jedan amandman koji se odnosi na član 6. stav 1., Lidija Bradara četiri amandmana koji se odnose na čl. 1., 9., 30. i 40. i Klub delegata hrvatskog naroda dva amandmana koji se odnose na čl. 4. i 8.

Vlada Federacije dostavila je pisano Izjašnjenje o neprihvatanju amandmana Lidije Bradare.

Prijedlog Zakona je obrazložila Hanka Mušinbegović, pomoćnica ministra u Sektoru za prostorno planiranje Federalnog ministarstva prostornog uređenja, koja je, ispred Vlade Federacije, izjavila da prihvata Amandman Mirsada Pindže i Amandman I Kluba delegata hrvatskog naroda, dok Amandman II ovog Kluba nije prihvatila.

Prihvaćeni amandmani glase:

Amandman Mirsada Pindže

U članu 6. stav 1. se briše.

Amandman I Kluba delegata hrvatskog naroda

Član 4. se briše.

U pretresu su učestvovali Elvira Abdić-Jelenović, Hanka Mušinbegović i Mislav Sučić.

S obzirom na to da podnosioci nisu odustali od amandmana predsjedavajući ih je dao na glasanje i konstatovao sljedeće:

- Amandman II Kluba delegata hrvatskog naroda nije dobio potrebnu većinu jer je za njega glasalo 15 delegata.

Amandmani Lidije Bradare:

- Amandman I nije dobio potrebnu većinu glasova jer je za njega glasalo 14 delegata,

- Amandman II nije dobio potrebnu većinu glasova jer je za njega glasalo 17 delegata,

- Amandman III nije dobio potrebnu većinu glasova jer je za njega glasalo 17 delegata,

- Amandman IV nije dobio potrebnu većinu glasova jer je za njega glasalo 17 delegata.

Nakon toga predsjedavajući je dao Prijedlog Zakona na glasanje.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 29 glasova za, uz jedan glas protiv i uz 11 uzdržanih glasova, usvojio Prijedlog Zakona o izmjenama i dopunama Zakona o prostornom planiranju i korištenju zemljišta na nivou Federacije Bosne i Hercegovine.

Prema tome Prijedlog Zakona je usvojen u različitom tekstu u oba doma Parlamenta Federacije Bosne i Hercegovine pa ga je **potrebno usaglasiti**.

12. Prijedlog Zakona o izmjenama i dopunama Zakona o provedbi odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini

Prijedlog Zakona utvrdila je Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrali su: Zakonodavno-pravna komisija, Komisija za ljudska prava i slobode i Odbor za prostorno uređenje, ekologiju i stambeno-komunalne poslove, koji su dostavili svoje izvještaje.

U pretresu nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 43 glasa za i uz jedan uzdržani glas, usvojio Prijedlog Zakona o izmjenama i dopunama Zakona o provedbi odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini.

13. Nacrt Zakona o finansijsko-informatičkoj agenciji

Prijedlog Zakona utvrdila je Vlada Federacije.

Predstavnički dom je na nastavku 2. sjednice, održane 30.05.2007. godine, usvojio Zakon u formi prijedloga u tekstu kako ga je predložila Vlada Federacije.

Ovaj Zakon u formi prijedloga su razmatrala nadležna radna tijela koja su dostavila svoje izvještaje.

U pretresu su učestvovali: Muhamed Osmić, Lidija Bradara, Besim Imamović, Mira Bradara, pomoćnica federalnog ministra finansija, Jasenko Tufekčić, predsjednik Kluba delegata bošnjačkog naroda i Asim Mekić.

Na osnovu rezultata glasanja, predsjedavajući je konstatovao da Dom naroda Parlamenta Federacije Bosne i Hercegovine nije prihvatio Nacrt Zakona o finansijsko-informatičkoj agenciji jer je za njega glasalo 27 delegata, dva su bila protiv, a šest delegata je bilo uzdržano.

14. a) **Odluka o davanju saglasnosti za prihvatanje kredita Fonda za Međunarodni razvoj (OPEC) za finansiranje Projekta unapređenja ruralnog poduzetništva**
- b) **Odluka o davanju saglasnosti za zaključivanje Supsidijarnog kreditnog sporazuma između Federacije Bosne i Hercegovine i Bosne i Hercegovine za kredit Fonda za Međunarodni razvoj (OPEC) za Projekt unapređenja ruralnog poduzetništva**
- c) **Informacija o kreditu Fonda za Međunarodni razvoj (OPEC) za Projekat unapređenje ruralnog poduzetništva**

Ove odluke donijela je Vlada Federacije i dostavila ih Parlamentu Federacije Bosne i Hercegovine radi razmatranja i odobrenja.

Predstavnički dom je na nastavku 2. sjednice, održane 05.06.2007. godine, odobrio ove odluke.

Odluke su razmatrali: Odbor za poljoprivredu, vodoprivredu i šumarstvo I, na zajedničkoj sjednici, Odbor za ekonomsku i razvojnu politiku, finansije i budžet i Odbor za privredu, koji su dostavili svoje izvještaje.

Odluke su obrazložili: Enver Trepčić, pomoćnik federalnog ministra finansija, i Halil Omanović, direktor Jedinice za implementaciju Projekta unapređenja ruralnog poduzetništva.

Predsjedavajući je predložio da se o ovim odlukama vodi zajednička rasprava a da izjašnjavanje bude pojedinačno, što su delegati prihvatili.

U raspravi nije niko učestvovao.

- a) **Odluka o davanju saglasnosti za prihvatanje kredita Fonda za Međunarodni razvoj (OPEC) za finansiranje Projekta unapređenja ruralnog poduzetništva**

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 38 glasova, donio Odluku kojom je odobrio Odluku o davanju saglasnosti za prihvatanje kredita Fonda za Međunarodni razvoj (OPEC) za finansiranje Projekta unapređenja ruralnog poduzetništva.

b) Odluka o davanju saglasnosti za zaključivanje Supsidijarnog kreditnog sporazuma između Federacije Bosne i Hercegovine i Bosne i Hercegovine za kredit Fonda za Međunarodni razvoj (OPEC) za Projekt unapređenja ruralnog poduzetništva

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 38 glasova, donio Odluku kojom je odobrio Odluku o davanju saglasnosti za zaključivanje Supsidijarnog kreditnog sporazuma između Federacije Bosne i Hercegovine i Bosne i Hercegovine za kredit Fonda za Međunarodni razvoj (OPEC) za Projekt unapređenja ruralnog poduzetništva.

c) Informacija o kreditu Fonda za Međunarodni razvoj (OPEC) za Projekt unapređenja ruralnog poduzetništva

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno sa 39 glasova, usvojio sljedeći:0

ZAKLJUČAK

Dom naroda Parlamenta Federacije Bosne i Hercegovine prima na znanje Informaciju o kreditu Fonda za Međunarodni razvoj (OPEC) za Projekt unapređenja ruralnog poduzetništva.

15. a) Odluka o davanju saglasnosti za prihvatanje kredita Evropske investicione banke za finansiranje Projekta «Rehabilitacija cesta u Federaciji Bosne i Hercegovine»
- b) Odluka o davanju saglasnosti za zaključivanje Podugovora o kreditu između Bosne i Hercegovine i Federacije Bosne i Hercegovine za kredit Evropske investicione banke (EIB) za Projekt «Rehabilitacija cesta u Federaciji Bosne i Hercegovine»
- c) Informacija o finansiranju Projekta «Rehabilitacija cesta u Federaciji Bosne i Hercegovine» iz kredita Evropske investicione banke

Ove odluke donijela je Vlada Federacije i dostavila ih Parlamentu Federacije Bosne i Hercegovine radi razmatranja i odobrenja.

Predstavnički dom je na nastavku 2. sjednice, održane 05.06.2007. godine, odobrio ove odluke.

Odluke su razmatrala nadležna radna tijela koja su dostavila svoje izvještaje.

Odluke je obrazložio Enver Trepčić, pomoćnik federalnog ministra finansija.

Predsjedavajući Stjepan Krešić, koji je u međuvremenu preuzeo rukovođenje sjednicom, predložio je da se o ovim odlukama vodi zajednička rasprava a izjašnjavanje bude pojedinačno, što su delegati prihvatili.

U raspravi su učestvovali: Muhamed Osmić, koji je dao primjedbu da umjesto puta Žepče-Ozimica stoji put Žepče preko Perkovića - Maglaj, odnosno preko Novog Šehera-Tešanj i Lidija Bradara da se izvrši prekategorijska regionalne ceste R442, Kaonik-Kiseljak-Blažuj u magistralnu cestu M5. Primjedbu Lidije Bradare podržao je Asim Mekić.

a) Odluka o davanju saglasnosti za prihvatanje kredita Evropske investicione banke za finansiranje Projekta «Rehabilitacija cesta u Federaciji Bosne i Hercegovine»

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 39 glasova, donio Odluku kojom je odobrio Odluku o davanju saglasnosti za prihvatanje kredita Evropske investicione banke za finansiranje Projekta «Rehabilitacija cesta u Federaciji Bosne i Hercegovine», sa primjedbama datim u raspravi.

b) Odluka o davanju saglasnosti za zaključivanje Podugovora o kreditu između Bosne i Hercegovine i Federacije Bosne i Hercegovine za kredit Evropske investicione banke (EIB) za Projekt «Rehabilitacija cesta u Federaciji Bosne i Hercegovine»

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 39 glasova, donio Odluku kojom je odobrio Odluku o davanju saglasnosti za zaključivanje Podugovora o kreditu između Bosne i Hercegovine i Federacije Bosne i Hercegovine za kredit Evropske investicione banke (EIB) za Projekt «Rehabilitacija cesta u Federaciji Bosne i Hercegovine».

c) Informacija o finansiranju Projekta «Rehabilitacija cesta u Federaciji Bosne i Hercegovine» iz kredita Evropske investicione banke

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 39 glasova, usvojio sljedeći:

ZAKLJUČAK

Dom naroda Parlamenta Federacije Bosne i Hercegovine prima na znanje Informaciju o finansiranju Projekta «Rehabilitacija cesta u Federaciji Bosne i Hercegovine» iz kredita Evropske investicione banke.

16. Izvještaj o radu Nadzornog odbora Agencije za privatizaciju u Federaciji Bosne i Hercegovine za period od 01.07.2005. do 30.06.2006. godine

Na osnovu člana 13. Zakona o Agenciji za privatizaciju Nadzorni odbor Agencije za privatizaciju u Federaciji Bosne i Hercegovine podnio je Izvještaj o svom radu Parlamentu Federacije Bosne i Hercegovine.

Predstavnički dom Parlamenta Federacije je na nastavku 2. sjednice, održane 05.06.2007. godine, prihvatio Izvještaj i usvojio zaključke.

Izvještaj su razmatrala nadležna radna tijela koja su dostavila svoje izvještaje.

Izvještaj je obrazložio Dragomir Došenović, član Nadzornog odbora Agencije za privatizaciju.

Ispred Odbora za denacionalizaciju i privatizaciju govorio je Alija Begović i predložio da Dom naroda donese zaključak koji je pročitao. U svoje ime, predložio je da rok za realizaciju zaključka bude tri mjeseca od dana donošenja zaključka.

U raspravi su učestvovali Elvira Abdić-Jelenović i Dragomir Došenović.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 35 glasova za, uz jedan glas protiv i uz dva uzdržana glasa, prihvatio Izvještaj o radu Nadzornog odbora Agencije za privatizaciju u Federaciji Bosne i Hercegovine za period od 01.07.2005. do 30.06.2006. godine, sa primjedbama Elvire Abdić Jelenović, koje će biti upućene nadležnim institucijama, radi davanja odgovora.

Dom naroda je na prijedlog Odbora za denacionalizaciju i privatizaciju usvojio i sljedeći:

ZAKLJUČAK

1. Dom naroda Parlamenta Federacije Bosne i Hercegovine traži od Vlade Federacije Bosne i Hercegovine da u roku od tri mjeseca od dana donošenja ovog Zaključka dostavi informacije o svim realiziranim ugovorima Agencije za privatizaciju u Federaciji Bosne i Hercegovine, stepenu njihovog ispunjenja i poduzetim mjerama u slučaju neprovođenja ugovora.
2. Dom naroda Parlamenta Federacije Bosne i Hercegovine traži od Vlade Federacije Bosne i Hercegovine da u roku od tri mjeseca od dana donošenja ovog Zaključka dostavi informacije o svim realiziranim ugovorima kantonalnih agencija za

privatizaciju, stepenu njihovog ispunjenja i poduzetim mjerama u slučaju neprovođenja ugovora.

3. Dom naroda Parlamenta Federacije Bosne i Hercegovine traži od Vlade Federacije Bosne i Hercegovine da u roku od tri mjeseca od dana donošenja ovog Zaključka dostavi, informacije o aktivnostima koje su poduzete u izradi zakonske regulative koja regulira oblast restitucije.

17. Izvještaj o radu Regulatorne komisije za električnu energiju u Federaciji Bosne i Hercegovine za 2006. godinu

Na osnovu člana 16. Zakona o električnoj energiji FERK je dužan podnositi izvještaj o svom radu Parlamentu Federacije Bosne i Hercegovine najmanje jedanput godišnje.

Predstavnički dom Parlamenta Federacije je na nastavku 2. sjednice, održane 05.06.2007. godine, prihvatio Izvještaj.

Izvještaj su razmatrala nadležna radna tijela, koja su dostavila svoje izvještaje.

U raspravi su učestvovali: Asim Mekić, Zdenko Šimunović, predsjednik Regulatorne komisije za električnu energiju, Risto Mandrapa, član Regulatorne komisije za električnu energiju, i Josip Perić, predsjednik Kluba delegata hrvatskog naroda.

Na osnovu rezultata glasanja, predsjedavajući je konstatovao da Dom naroda Parlamenta Federacije Bosne i Hercegovine nije prihvatio Izvještaj o radu Regulatorne komisije za električnu energiju u Federaciji Bosne i Hercegovine za 2006. godinu jer je za glasalo 26 delegata, dva su bila protiv, a 12 je bilo uzdržano.

18. Godišnji izvještaj Visokog sudskog i tužilačkog vijeća Bosne i Hercegovine

Na osnovu člana 20. Zakona o Visokom sudskom i tužilačkom vijeću Bosne i Hercegovine ovo Vijeće je dostavilo Godišnji izvještaj Parlamentu Federacije Bosne i Hercegovine u svrhu informiranja.

Predstavnički dom Parlamenta Federacije je na nastavku 2. sjednice, održane 05.06.2007. godine, razmatrao Izvještaj i primio ga na znanje.

Izvještaj je razmatrao Odbor za pravdu, opću upravu i lokalnu samoupravu, koji je dostavio svoj Izvještaj.

S obzirom na to da sjednici nije prisustvovao predstavnik Visokog sudskog i tužilačkog vijeća Bosne i Hercegovine predsjedavajući je predložio da se ova tačka skine s dnevnog reda, što su delegati prihvatili.

19. Izvještaj o izvršenju Budžeta Federacije Bosne i Hercegovine u periodu od 01.01. 2006. do 31.12.2006. godine

Vlada Federacije je dostavila Izvještaj Parlamentu Federacije radi razmatranja i usvajanja.

Predstavnički dom na nastavku 2. sjednice, održane 05.06.2007. godine, nije prihvatio Izvještaj jer nije dobio potrebnu većinu glasova.

Izvještaj su razmatrala nadležna radna tijela koja su dostavila svoje izvještaje.

Izvještaj je obrazložio Pero Ivošević, pomoćnik federalnog ministra finansija.

U raspravi su učestvovali Saša Magazinović i Besim Imamović.

Na osnovu rezultata glasanja, predsjedavajući je konstatovao da Dom naroda Parlamenta Federacije Bosne i Hercegovine nije prihvatio Izvještaj o izvršenju Budžeta Federacije Bosne i Hercegovine u periodu od 01.01. 2006. do 31.12.2006. godine jer je za glasalo 18 delegata, 14 je bilo protiv, a šest je bilo uzdržanih.

20. Izbori i imenovanja

a) Odluka o formiranju Zajedničke komisije oba doma Parlamenta Federacije Bosne i Hercegovine za provedbu cjelokupne procedure u vezi sa izborom likovnog rješenja obilježja-znamenja Federacije Bosne i Hercegovine

Predstavnički dom je na nastavku 1. sjednice, održane 15.05.2007. godine, donio Odluku o formiranju Zajedničke komisije.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno, sa 42 glasa, donio Odluku o formiranju Zajedničke komisije oba doma Parlamenta Federacije Bosne i Hercegovine za provedbu cjelokupne procedure u vezi sa izborom likovnog rješenja obilježja-znamenja Federacije Bosne i Hercegovine.

b) Odluka o izboru članova u Zajedničku komisiju oba doma Parlamenta Federacije Bosne i Hercegovine za provedbu cjelokupne procedure u vezi sa izborom likovnog rješenja obilježja-znamenja Federacije Bosne i Hercegovine

Predsjedavajući je podsjetio delegate da je Dom naroda Parlamenta Federacije Bosne i Hercegovine na prošloj sjednici predložio sastav Zajedničke komisije i dostavio ga Predstavničkom domu.

Predstavnički dom je na nastavku 1. sjednice, održane 15.05.2007. godine, donio Odluku o izboru članova u Zajedničku komisiju, s tim što je u

tački II predviđeno da će zamjenika predsjednika Komisije izabrati Dom naroda.

Komisija za izbor i imenovanja je dostavila svoj Izvještaj.

U raspravi su učestvovali Miro Lazović i Jasenko Tufekčić, predsjednik Kluba delegata bošnjačkog naroda.

Delegati su, sa 42 glasa, prihvatili prijedlog Jasenka Tufekčića da predsjednik Komisije bude iz Doma naroda i da se izabere na samoj Komisiji.

S obzirom na to da je Komisija za izbor i imenovanja predložila izmjenu tačke II, tj. da predsjednik Zajedničke komisije bude iz Doma naroda iz reda hrvatskog naroda, predsjedavajući je dao prijedlog na glasanje i konstatovao da ga je i Dom naroda Parlamenta Federacije Bosne i Hercegovine, sa 42 glasa za i uz jedan glas protiv, usvojio.

Potom se prešlo na glasanje o Odluci u cjelini.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 42 glasa za i uz jedan glas protiv, donio Odluku o izboru članova u Zajedničku komisiju oba doma Parlamenta Federacije Bosne i Hercegovine za provedbu cjelokupne procedure u vezi sa izborom likovnog rješenja obilježja-znamenja Federacije Bosne i Hercegovine.

c) Prijedlog Odluke o izmjenama i dopunama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine

Prijedlog Odluke je utvrdila Komisija za izbor i imenovanja.

Ispred Komisije Prijedlog Odluke je pročitao Zaim Imamović Kaze, zamjenik predsjednika Komisije.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine jednoglasno donio Odluku o izmjenama i dopunama Odluke o izboru predsjednika, zamjenika predsjednika i članova radnih tijela Doma naroda Parlamenta Federacije Bosne i Hercegovine, kojom je:

- u Komisiju za ustavna pitanja iz reda stručnih, naučnih, kulturnih i javnih radnika imenovana **Kanita Imamović-Čizmić**,
- u Zakonodavno-pravnu komisiju izabran **Slobodan Tomić** umjesto Velimira Kunića,
- u Komisiju za jednakopravnost spolova izabran **Slobodan Tomić** umjesto Daliborke Milović,
- u Odbor za prostorno uređenje, ekologiju i stambeno-komunalne poslove izabran **Bojan Bošnjak** umjesto Drage Puzigaće i
- u Odbor za pravdu, opću upravu i lokalnu samoupravu izabran **Bojan Bošnjak** umjesto Mirka Pejanovića.

d) Odluka o formiranju Parlamentarne komisije odgovorne za reviziju

U skladu sa odredbama Zakona o reviziji institucija u Federaciji Bosne i Hercegovine potrebno je formirati parlamentarnu komisiju odgovornu za reviziju kao stalno zajedničko radno tijelo oba doma Parlamenta Federacije Bosne i Hercegovine.

Prijedlog Odluke je utvrdila Komisija za izbor i imenovanja i dostavila Izvještaj u kojem je predložila članove iz Doma naroda u Parlamentarnu komisiju.

Ispred Komisije Prijedlog Odluke je pročitao Zaim Imamović Kaze, zamjenik predsjednika Komisije, koji je izjavio da je došlo do tehničke greške u tački II Prijedloga Odluke tako da prvu alineju treba brisati.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta jednoglasno, sa 43 glasa, donio Odluku o formiranju Parlamentarne komisije odgovorne za reviziju.

* * *

Sjednica je završena u 15.45.

Magnetofonski snimak sjednice i prijepis snimka sjednice čine sastavni dio Zapisnika.

SEKRETAR

Izmir Hadživdić

PREDSJEDAVALAČI

Stjepan Krešić